

羅浮山志會編

羅浮山志會編卷之十三

長洲宋廣業澄溪集輯

藝文志四

疏

代道士化見日庵疏

明

黃

畿

宗大香山

鬱羅聳空上夙欽仲晦之詩浮游守規中常佩伯陽之契遺世無若飛雲見日煉丹必於福地洞天火候須應扶桑山庵已爲茂草有勞簪笈無計帡幪來者雖樂煙霞去之則愁風雨玉樹翳中黃之灝炁瑤池

疏

一

湮太赤之韶鈞要得般匠躬營還仗方兄首肯同成
善果共購良材所期海上鳥飛半夜湧金輪於萬里
庶協身中冬至周年成珠黍於三元

募修羅浮諸名勝疏

明 尹守衡 冲元

人生三萬六千日世上英雄豪傑雖然幾有片時住
足之期羅浮四百三十峯粵中先達名賢竝以此爲
到老回頭之地蓋青霞洞裏讀書樓石壁丹梯湛泉
翁高山可仰洗耳池邊棲隱處茅庵草屋葉綱老石
洞還佳竊念吾儕不向此中漱石枕流這等癡人更
覓何處名山勝水不佞從事四方縱遊吳越每見一
邱一壑金壁輝煌卽有剩水殘山琉璃燦爛直加點
綴便作奇觀載攷羅浮舊誌係居第七洞天璇宮瑤

室雖曰天固造之地固設之寶殿琪林不知昔也何
多今也何少葛仙翁丹竈藥爐孤邱虎穴文皇帝金
書玉簡荆棘銅駝冲虛觀一洞道房十崩九破黃龍
洞幾間院宇有屋無扉風雨固多漂搖人天應有劫
壞過去者已付之浮雲流水未來者還望之檀越元
宗試步梅花月下少憇花陰玉骨冰魂宛存夢寐或
從玉女峯頭側聆天樂風環月珮恍見仙姿似茲妙
境靈通忍使影光埋沒女媧氏鍊五色石補青天滿
見煙靑日朗衆君子捨十方錢成善果自令虎嘯龍

嗟達士識山之趣高人絕世之慳不佞故以域中大
勝地望境內大英豪幸億萬衆大布施種千百年大
功德臨疏可勝祝願之至

募修羅浮諸名勝疏

韓日續

緒仲博羅

原夫蓬碣之標庠窳之境洞天福地勝蹟名區霧鎖雲攢巖嵒還資鼓吹奇張界傲山靈必賴主盟况羅浮山者遠著道笈近託人寰雖羣真踏踏似迴隔于三千而雙屐騰騰實恣遊夫四百匪三山之風却琳宮貝闕詎任羣蕪豈七聖之路迷瑤草琪葩可堪蒿沒何圖劫數偏屬仙都寂歷空山玉簡金書將漉漫迢遙虛谷雲璈法鼓欲銷沉夜月冷梅花尙覩匝枝

月冥煙封葛鼎空餘搗藥禽聲若夫叩禪室於林

端蒼蘚每迷古碣訪香臺於世外白雲間出孤僧貝
葉落而曇花凋金猊塞而伽烏戢卽六賢倡學當年
亦鹿洞鷺湖詎數椽垂顛今日總神林後穴謝鯤一
丘一壑蒙茸曷辱品題許椽勝具勝情蔚蒼那供枕
漱歷覽佳境非一未有厄運如茲竊亮夙具清緣者
必憾影光之埋沒遙飛逸興者必思點綴之輝煌者
也不佞恭修寸牘通告十方爲室非求一木廣期禪
教破慳綴裘不厭千狐滿望元宗曾拾孰修補而足
則媧皇之煉五色孰剏建可施則黔雷之闢二儀丹

丘則琉璃臺矗而玉戶開八桂森而五芝秀寶剎則散
花霏而流香馥南倡啓而北機清理學則前張法席
後振宗風可供景仰登涉則累榭雲敷層臺景翳足
暢嘯歌庶幾五百年開山不滅十二樓飛錫云爾凡
我同人幸成善果共期滿大願力母悵弘大布施臨
疏可任懃懃之至

募修羅浮諸名勝疏

明何吾騶

象岡香山

羅浮洞天福地四百三十二峯從來神仙之所居靈異之所產怪譎之所變志乘之所傳騷人墨客之所歌咏盡此矣懷五岳而見志仰高山以行止其孰不慕之乃數百年來琳宮貝闕蕭寺經亭大半委蕪莽此豈盡山運哉若海韓先生全鍾羅浮出現宰官者有袁道生李煙客黃逢永一世高士因相與謀之茲山之神以次第修復名勝爲願先生慨然作疏真有五丁不得不運兩山不得不開者因謂吾騶併引一

言一騶竊謂佛之教人也戒吝務捨蘇子瞻謂必捨所愛者夫有千金之家十數金非所甚愛也有萬金之家百數金非所甚愛也如此而不能捨又何論所甚愛若捨錢入佛捨家宅作寺者且捨而揮之東海乎何若揮之名山予嘗謂世間稱仙必曰天上夫仙不在天上山之人耳捨十數金百數金而得列名仙府金壁輝煌姓字俱香請挈舟偕親友而過之齋設登禮後拂碑一讀曰此地常賴君以興是何如其爽快也載筆歌咏勒之貞珉百年千年之後子孫再遊

其地曰吾某祖某公當日捨重金而構此堂此臺此室此閣也一再遊其地而紀之以詩也又何如其爽快也且世間人三餐所需交遊宴會所費公私經營所耗積日月歲時用至不貲矣亦曾有毫釐可留以不盡者乎獨至於修羅浮諸勝有十數百數皆將與所修者或百年計或千年計傳以不朽此亦延促之至不同而我輩之所當猛自省者也且夫人家一歲楮帛祈禱之費又至不貲矣可分毫有着落而神明爲晤對否今以贈仙佛至聖修闢之用世無神仙則

已有必喜而福佑之如之何其吝也如之何其勿捨也吾騁請以是說引於若海先生之後

募修羅浮諸名勝疏

明 崔奇觀 峽瀾

羅浮佐衡而峙雄視天南固天南一巨觀也母論載
在道書福地洞天仙靈攸萃卽隸在方服宅離曜真
固人文所關者也夫地旣關乎人文宜往來其間以
迂其休以答其眈而令茀草屏翳遊屐輒而不前棖
棟傾頽山靈羞而自匿固刼數之或爾亦人事之使
然善乎韓何二公疏以倡之諸士勸而募之也韓疏
摘麗裁雲務在搜剔靡遺于以侈山之盛何疏言近
指遠務在迎機善入于以醒世之慳夫盛者言乎所

自始也而示以凌夷而至今日有不淒然動色乎慳者彼但匿其所有也而示以饒益而獲十倍有不灑然易念乎球鍾考而木鐸應金鑪挾而甘露隨蓋匪直廣福田將以維雅道匪直爭形勝將以振文風夫峯有四百而麗其下者何翅擺指其人洞有羣真而降在人間者何能更僕而數苟非頓忘歸路疇肯自昧本心不佞但願其如伐太木前耶後許則願力自齊如建浮屠從此合尖則階級立見行且少者多難者易廢者舉屯者亨名山幸甚人文幸甚不佞亦幸甚

募修羅浮諸名勝疏

張萱

西園博羅

余數讀鄉先哲陳公璉湛公若水黃公佐羅浮三志便覺向禽去人不遠然三公皆非羅浮產也遙聞聲而相思尙能爲四百三十二君表章靈秘如此余且自呼爲九嶽山人矣嶽有十羅浮其一此几案間物日當前而不御安問其九不亦慙乎自歸善葉春及卜築羅浮日石洞余數過之必宿聚霞峯夜半見日而後返歲以爲常己卯冬十月先師金華趙文懿公偕南海黎秘書民表寶安祁孝廉衍曾過石洞折簡

余復獲從文懿公縱觀日出處獻遊羅浮賦萬餘言
文懿公擊節久之今亡矣數欲補亡而未逮也歲辛
巳余遂携先弟國子仲蔚讀書朱明洞遺履軒中逮
壬午同舉於鄉先司徒曰非四百三十二君之靈不
及此一作牛馬走頓令鶴怨猿啼每欲尋遂初賦則
濟勝無具數歲一至而已不能置身丘壑爲四百三
十二君日執糞除之役蓋中心藏之今幸里中宗伯
韓公寶安司馬袁公重建朱明洞冲虛觀則鮑葛二
公板宅處也吳諸名流疏語寸木拳石塊甌片瓠皆

舍舊而新是圖計非千餘金不可己已夏四月按臺
宣州吳公行部吾循十邑諸紳縫皆僉謀以共成韓
袁二公不朽盛事余因詳述宋儒胡翼之先生語偕
十邑紳縫請於按臺及藩伯古蒲陳公署府司理荆
州李公皆歡喜無量一時郡邑諸當事亦皆懽喜無
量共捐計日之俸以成不日之功此四百三十二君
千載一時也夫二氏之端亦鬼神之說也孔子曰務
民之義余敢有越志憶居長安日常過一神祠題其
兩楹曰惟神聰明正直不能事人何以事神惟神幽

深元遠與其聽神孰若聽人孔子卽問禮於猶龍然
聖人不師仙余餞家君房雲笈七籤序而行之其說
具在惟是役也韓袁二公儼然首事臺公藩公司理
公郡邑諸當事及十邑諸紳縫躍然終事余於鮑葛
二公能遠之而能不敬之乎白頭壤父歲常操豚蹄
祝滿篝於朱明洞口瓶中幸能宿春亦何敢有越志
竊以三十庾爲冲虛之觀稱事而旣廩焉遺履之軒
則壤父故下帷者文懿公爲南太司成日嘗寄題曰
二妙讀書臺亦宜革故鼎新一時竝舉以附韓袁二

公於不朽費卽不貲自當悉索敝賦以從非異人任也嗟嗟壤父視陰矣復能着幾兩屐以徼福於鮑葛二公唯是四百三十二君則六十年前布衣交敢不降心相從以聽翼之先生務民義爲鎮遏龍蛇蚤計若鮑葛二公卽惠而好我天路坐相邀余亦期期不敢聽也

募修羅浮諸名勝疏

其二

張 萱

乙丑之役尹明府冲元何象岡太史崔岷瀾侍御及韓宗伯若海四公實首事焉具在疏語題曰重修羅浮諸名勝復臚列諸名勝於簡端凡二十有二前制府宜興何公檄惠州府以部院贖鍰三十金助之主進者寶安友人袁徵君翩也時余抱疴却掃不及一晤徵君與聞其詳不知爾時境內外諸好義者捐貲多寡竟在誰手有成籍否歲丙寅有事朱明洞始知徵君業已經始冲虛舊觀僅揭一材亢於風日中輒

罷去今且蠹而圯矣諸黃冠蹙額曰徵君雅意圖新
然絕不相聞者已五年遠袁大司馬復首舉是役豈
亦徵君所從與乎第非余里中韓宗伯實任拮据間
以見語余亦不得與聞其詳效一臂也今宗伯公以
余有一日之長閒居可以將作數四見屬誼不獲辭
故再矢一言告諸同事若何稱畚築若何程土物若
何具餼糧攻木之工某若而人攻石之工某若而人
塗墍之工某若而人丹雘之工某若而人奔走於不
時之庸者若而人以庸爲差材必良工必善日省而

月試者閭長曾君奕芳斤君秉中梁君日遷何君九
儀林君樹夢諸工役之請粟者必平其概請鏹者必
平其衡而揣厚薄畧基址則仍舊貫罔敢少愆於素
皆詳著於篇庶捐資者得覆按焉亦惟是三清殿玉
簡亭洞之門觀列仙祠葛仙祠丹竈亭凡六若遺履
軒余獨任之且先考之以憩諸同事之日省而月試
者其所請益惟白蓮池橋之上建一石棹楔以表臺
公藩公不朽之賜不可不亟圖也余按宋郡守趙公
汝馭嘗構五名勝曰展雲門曰仙春亭曰橫翠亭曰

見日庵而記曰屬博羅令贊其事以明年成載在黃
宮詹羅浮志中蘇文忠公以宋紹聖元年安置惠州
凡四年所四百三十二峯杖履殆遍及徙昌化乃留
家羅浮山下嘗構東坡山房於朱明洞中已具宗伯
公所識不知何年諸黃冠去其名廢爲下院以列庖
屬宗伯公數以語余歸善白鶴峯東坡故居尙存無
恙博羅朱明洞東坡山房可置弗問乎今日之役冲
虛觀旣考成或有餘貲宜重建一亭於泉源福地俗
名分水凹者憩蠟屐以存趙公遺蹟識不忘東坡山

房亦宜一時竝建此又韓袁二公可賈之餘勇今諸
黃冠業携疏冊丐境內外捐助諸好義自當赴響然
出納之司已已夏五之後乃敢與聞若己已夏五之
前則袁徵君在敢布腹心

募修羅浮山寶積等寺緣疏 鄭 鄭

羅浮爲十洞天之一名勝甲於寓內余以家慈香愿
來登飛雲之巔宿大繇樹下爰得異感時僕夫遺火
石不可得炊瞑色已重四無人煙羣猜且當吸露俄
而微光吐焰於林間衆共驚視乃有濕柴在水坳中
水浸之而不熄黃梁就烹遂獲煖觸之利是一異也
同遊諸子舉青蓮海日天鷄之句或謂有海日而無
天鷄及四更許見初暘升忽然耳邊鷄聲一鳴聲甚
小而長三十里內無復廬舍是聲胡爲乎來哉是又

一異也若乃冒雨初登而不遇雨席地憩臥而毒蟲
皆避疑不聞鳥聲遂見五色鳥飛翔來迎疑無山獸
則有玄猿挂於隔崖樹間擲身見人而笑種種不可
更僕子遊名山多矣未有靈異若斯者也然亦未有
數十里內荒曠若斯者也環山稍可憩者獨有寶積
寺寺僧獨十虛一人虛本楚僧宗說兩通書奕擅技
來羅浮都置不談手自作務混跡勞侶先是山中人
望寺有光疑地有宿藏共畚發之乃得二鐵像攷其
記爲梁初智藥三藏景泰二禪師像像出光遂隱時

值虛初來虛豈其後身耶寺有卓錫泉坡仙評爲人
粵第一泉水簾澗梅花村環繞左右勝甲羅浮然亦
荒曠數椽而已余謂諸子欲羅浮便於遊者宜於山
巔復見日庵之蹟下此而天廚泉次玉女峯邊皆當
有茅舍或石亭以僧守之聯屬及於寶積使遊人隨
至可憩而後羅浮之奇可得容與盡也則今嘗以寶
積爲經始十虛云博羅韓太宗伯業許爲檀越今仁
勝集應是寶積緣生時也余宿曾習宗伯卓然隆望
何減坡公題泉而後當又開一生面矣于時諸子舍

然同可王子貞明慨任領袖余亦傾囊得寸金施爲
兩尊人所安并書其意爲題諸冊端而去

募修羅浮諸名勝疏

明

袁崇煥

元素
東莞

余生平有山水之癖卽一邱一壑俱低徊不忍故
十四年公車強半在外足跡幾遍宇內而羅浮洞天
去余家不四十里竟無暇盤桓其中徇外忘內余罪
也去冬予告歸方謂築室其中爲終焉之計未抵家
而明主促之再出使者絡繹道路兩旬席不暖又塞
上征夫矣其尙得與山靈作主人哉山中道士亦悵
然于余之行因林凡夫丐余言于募疏以風好善者
時車馬僕夫旁午戒行何能爲應抵關上而友人鄧

伯喬李煙客請歸煙客向與吾姻家緒仲宗伯謀興構山中各洞院宇脫者新之其空曠處阻遊人趾而不能徧取諸勝者各爲亭室以通之余嘉其志而爲之言曰羅浮在字內二十四洞天中載出丹書石室甚備緣僻居南徼游人鮮得過而問之字內若不知有山靈而山靈則能貞之字內也蓋山以靜爲體無所擾之自止于寂無所混之自依于淨山靈又何樂乎多方點綴以減其天真耶煙客曰自有此山以來其中爲山靈護法不知幾許庵堂觀院成而毀毀而

成不知幾許山靈俱以爲過眼之空花浮身之泡影
吾以了吾念且借山靈以合大緣於世宙終南非捷
北山不移何足爲山靈重庶不爲山靈累也余笑謂
之曰山之人爲仙仙者長生久視之謂今仙人安在
哉則仙之亦歸於盡明矣惟山終古以長存則人靈
不如山靈然山常艮常止止得其爲山人旅生旅死
不失其爲人余又以爲山靈之不若人靈也靈與不
靈吾安從辨之不若兩忘而化之于道至重興福地
曾納有情無爲而爲所謂吉祥善事也人不山耶山

不人耶都 不必計願有志者易之

又

袁崇煥

李煙客偕伯喬歸興羅浮有日矣余其何能忘因憶
昨來與伯喬過瞽溪寺僧告我云憨太師入寂時曰
我三十年後還以宰官來此修大殿余笑之曰是和
尙癡矣何不曰願得有情重新紺宇不必苦我之重
來蓋善緣何必自己出哉余將爲之所余至遼東一
日與李上人言及此事憶以爲身上不了者上人曰
宰官差矣何不轉一語曰願得有情完此功德又何
必自宰官手哉余頓足而懺悔於是悲我見之難空

今煙客南歸爲羅浮計而余無所以相助一一聽之
則又落人見矣夫隔四十里之名山不能一效其欸
欸而一萬里之醫巫閭忘身徇命以與邊徼爭余媿
也然地有南北山之靈山之性何分南北則醫巫閭
之未始非羅浮也則用心於醫巫閭與用心于羅浮
無二也則煙客與余二身也一心也一心而兩山也
不隔也異日自見之自如子同日又跋

募修羅浮諸名勝疏

李孫宸

伯襄
香山

夫空曠阻絕隱闕靜深去人間煙火惟恐不遠者山之幽韻也精藍異刹宏構廣修表章仙靈之窟宅使與人境不隔者人之善緣也故崇宮裏屋鞭石斬林無非人世罪業惟以施之名山寶地則種種俱是福田緣此觀之人自藉山靈爲善緣耳山靈則何藉于人哉吾粵羅浮肇自蓬萊佐命衡嶽兼洞天福地之勝而夜半見日則五嶽岱宗而外無聞焉獨以僻在嶺外表章者少坐使山靈得以傲其空曠阻絕隱闕

靜深之韻與人境若隔余乙卯休沐裹糧往遊宿飛
雲頂夜半觀滄海日出與華葛諸真相晤于若醒若
夢間有世外之期嗣來埋沒塵鞅忽忽十餘年今倦
遊燕市中念宿願莫酬河清不俟未嘗不冷汗浹背
忽伯喬煙客歸自榆關出袁大司馬所爲羅浮募緣
疏相示願得有情完此功德大都借山靈以合大緣
于世宙輒不覺欲投體皈依居恒謂人生剎那間空
華幻泡凡宇內名山勝地呂力之所及寓足力之所
及遊財力之所及施盡屬大因緣宿世善根所種昧

者機緣淺薄當眼亦自錯過大司馬肉食菩薩方在
戎馬倥傯發此宏願以牙後慧金篦快翳曾勸世人
凡茲一切有緣寧肯再自錯過夫得斗粟者食之立
盡耳春播之土秋穫成庾廩矣彼不知有秋之穫者
惜其棄食粒于淤泥不亦昧乎吾願諸善知識各隨
力量自覓善緣無與羅浮當眼錯過使得長自傲其
空曠阻絕隱閼靜深之韻也雖然吾聞之宇內洞天
福地皆有佛王主之彼無時不發大乘願普度有緣
豈真欲長自傲其空曠阻絕隱閼靜深之韻以自限

小乘也者則又安見人世之善緣不爲山靈之功臣也

募修羅浮諸名勝疏

明陳子壯

集生南海

學士多言神仙家如黃石之赤松衣白山人之衡嶽其彰明易稱據者也彼雄鷺之主紛紛入海求蓬萊安期之屬而臣朔以偷桃避世金馬門而不覺貞白挂冠神武而不能忘懷於吉凶征討之數以華陽隱居自署而不能脫山中宰相之名之二者又將奚居何宦籍邈滄海之觀而名山反致問答之緣也噫嘻天地大矣太史公謂大荒之內名山五千其在中國有五嶽作鎮羅浮括蒼輩爲佐命於五千而有五嶽

五嶽之佐有羅浮羅浮之區有我而我迺據羅浮以爲尊選一邱以自宅不猶然域於觀哉然而超士通儒每仍之而無替者何也聞之夜半見日方於登封山澤之氣通焉蓋坎離交而內外合此儒仙之一致也故鮑葛單王以之遐修濂溪豫章於斯澄悟琴軒甘泉泰泉諸先達之所以興廢存亡者此其概也然吾謂茲山惟不列五嶽僻於嶺徼封禪不得有事仕宦不得借徑以全其幽邃要眇之體而無損高真歷落之致所以可愛而傳者惟此客秋赴闕經廬山涉

天池佛手間見老衲而訪周顛仙之遺求所爲竹林
寺前後渺不可信顧惟詳近年之事閤亂政士大夫
竄名或祝髮而菴者往往而在因思其時越嶺而匿
間有之而可爲空谷之音矣使瑤室璇房庵其庵而
復有吾羅浮哉傳曰苟非其人道不虛行興廢存亡
之故待其人之行也審矣不佞壯初以罪廢不復經
始旣憂廢不敢與於中興總總然銖兩東方句曲之
異甚欲致慎其所以重名山無苟以名山重若惠好
不忘鼓舞作新以盡仙儒之致名實之理而卽爲韓

袁諸公他日之穀城衡嶽者甚樂於攄其效以有成也

募修羅浮山寶積等寺緣疏

陳元藻

慈谿

甲寅歲余兩奉使東西粵道經羅浮山麓弗獲一訪
洞天勝竊自媿仙緣薄也茲幸以海南北量移惠
陽則羅浮咫尺可到矣寧俟碧眼胡僧饒舌耶顧峯
巒奇絕猶昔寺宇半屬荆榛焚修之田俱入豪家之
籍緇流流落殆盡良可扼腕有十虛上人以大慈悲
發大願力欲募十方善信重興舊址因爲之讚歎不
已上人楚人也雅慕羅浮而卓錫茲浮土也善詩善
奕不詩不奕則逃於禪余嘗謂金剛妙義止在無所

住而生其心課音律既墮文字之障木野狐作祟於
定慧何居乃上人以了悟爲宗靈惺爲用恬澹而出
之以自然與袖穿齒落者霄壤而人神坐照具體通
幽坐談中元有懸解上人指點若神授寧止鬼陣相
攻已耶實諸所有空諸所無詩乎奕乎上人蓋深乎
禪矣蕭散森疎道化翔洽粵人士無不禮白足而施
金錢何俟余贅乃上人欲藉余護法因勒短疏普告
十方蓋凡夫流淪苦海障在慳貪呼吸無嘗積聚總
屬長物卽營營爲若子若孫計老弱體寧知身後倚

頓黔婁耶故須達多長者捨八百千金布八十頃地
良有以也多作諸惡不如修一善心修一善心能破
百種諸惡譬芥子卽同須彌投芥子火必能燒盡何
以故火能燒故種少善根亦復如是土麩一掬供佛
來生便王閻浮提婆羅門不信佛法輒羅黑鬼厄禍
青蚨聚散相仍元廬果報不爽涓滴可裨海嶽一錢
造福髓腦堪資檀樾四大微塵願爾等聞緣隨喜苦
海同登彼岸此上人度世慈航余爲之重宣教鐸如
風雲頃刻立就梵林色相莊嚴余遍覽三十二

天酬二十年來夙願頂禮十方善信功德無量矣

謹疏

募修羅浮山寶積等寺緣疏

明

李

模

灌籍
吳縣

按羅浮二山居洞天之七當增博兩界爲粵地之冠
瓊樓玉宇昔已見其巍峩礫砌頽垣今何久其寂寞
皆因潤澤無人遂使山林失色故朱明有洞僅借書
幌以耀靈而見日無庵誰傍元關以拱旭蕪靡侵其
芝室卽玉女亦懶乘鸞楸棘障其丹壇總金仙何心
跨鶴毒龍空閉穴久失制於安禪啞虎日迷塗已莫
控于羽客縱使尋真有路雲封蓮頂鐵橋寒竟至探
勝何人露宿蓬壺瑤石冷是宜百步一亭千步一庵

庶可棲真而憩尋幽之侶必使一人操筆百人畚插
始得隨地而成經始之營今者布金有地長者難逢
況乎裝寶無期良因易度二師現靈已寄光於鐵像
十虛積苦深憫晦於銅駝欲從寶積創興以至瑤池
底績工雖無量募竊有緣一鉢當山龍天獄府當亦
鑒其丹忱四體投地鳳閣宰官寧能吝其青盼倘積
少以基多瓊宮卽寓莖草惟自近以勸遠蓮臺可觀
琪葩仙緣佛緣憑念之妙喜以結生果冥果借金之
割捨而成輦貨肯來載福以往使功肯構朱甍絕獻

飛霞而德招提白衲半龕栖雨况有亭可憩不妨整
頓芒鞋且無宿可處一任閒憑雲插由是瓊漿堪飲
何止錫泉况有雲粉當餐不須珠黍是在檀越之指
掌樂助便可揭掀惟龍象之頂祈苦瀝以垂哀憫謹
合十指代疏萬緣是禱

募修羅浮山寶積等寺緣疏 陳子壯

大荒稱中國名山未及五嶺之外羅浮爲南嶽佐命
又居七洞之中安期聚會于玄丘葛令栖真于青觀
時聞鶴馭幾見蜚衣飛雲號爲絕巔屹立青霄之際
見日常於夜半俯視滄海之流下此則莽蒼甚遙中
皆蒿萊不剪而寶積寺者旣接泉源福地况當鍊柱
石樓東有水簾梅花之村西有黃龍蓬萊之洞形勝
宛如飛鷺歟少莊嚴虛空不住降龍頓成荒廢楚僧
十虛少善奕書早依餅鉢挂衣而宿桑下雖恩愛不

生荷畚而薙林中則筋力有限先是鐵像之光始露如舍利呈祥已而錫杖之遊止臨恍摩尼來照屢涸踪跡於儕輩僅免饑寒於歲時其所益者色身常借檀那作主其所修者白業必資蘭若怡神韓宗伯發隨喜之緣鄭太史加從臾之草捐資先後大構招提第功果難於獨成而善事必須衆建散金布地須達多成給孤之園跌草琪林孔長史置經行之室古來興起皆有主持游選佛之場豈少爲宰官爲居士禮飯僧之苑亦有善男子善女人類散有限之財共作

無量之福分千樹一葉之影卽是濃陰滅四海一滴
之泉便成膏澤然後法身現於百由旬內淨界成之
一剎那間功埒五王有漏翻成無漏福深二梵今生
倘是來生

募修羅浮山寶積等寺緣疏 蘇元起

羅浮僻在嶺南其中蓬島洞天仙釋窟宅余平生所
神遊也夢清頻入栩栩五城十二樓然終不若振衣
飛雲玉鸞之上之爲真歲戊辰叨令博邑私喜几席
山川柱頰觀爽可引屐陟巘可至詢之則云去縣郭
五十里而遙且簿書鞅掌登臨無暇山靈胡怪余乎
哉茲楚僧十虛間關萬里卸笠於山之寶積寺尋舊
址新之惠陽諸生願力護持併請余言夫羅浮余所
未至者安能言之曾閱郡志羅浮梵宮晶域蟬聯星

錯而寶積尤爲叢林冠冕蓋以卓錫開山也西域八
功德水其發竅于粵者香若南華冽若雲封而其清
涼滑甘則莫若卓錫故諸刹卽頽圯須緣募化必先
營寶積始亦曰是智藥景泰二師之鉢針大旨也修
習水觀入三摩地從此遍葺諸刹圓滿功德倘鳩工
庀材其誰不愛而助之聞之馬祖築庵山鬼助役况
夫知識衆生不自謂祝釐地乎坡公曰粵人輕施樂
捨以有愧慰二法助發善心夫冥果生果總根自心
歡喜也十虛苦行修證又得善心護持夙構之榛莽

盡開特地之乾坤頓開凡延祥南樓諸寺煙榭雨臺
悉爲煥如余將徼山靈未了之緣問道耀真踏雲躡
磴以縱目鼎新景象復探源卓錫滌六塵洗五濁庶
愜夙願焉昔坡公入廬山自謂不識面目然橫看成
嶺側成峯則旣已識之矣身之所至其景自真此中
琉璃金碧余當收歸吾里與騷人豪士侈談佳景以
當朝川一圖方諸平生栩栩清夢不尤愉快乎余不
善談禪且諸名公蓮舌讚歎咸破禪機余安庸贅之
故惟抒其臆若此

募修冲虛觀疏

陶

敬

肅公
江寧

冲虛觀在羅浮之陽固四百峯之十二樓而朱靈芝
葛洪鮑靚黃野人之流相繼棲真煉神羽化飛昇之
地也創於唐名於宋盛於洪永隆萬之間邇者貝闕
琳宮香臺古碣滿目丘墟雖地運衰旺之相尋亦物
力艱難之所致爾余生長三吳每有逍遙五嶽之志
金輪九子牛首諸峯芒鞋幾遍猶栩栩然於古梅花
下長髯囊中向四百君訂忘年之交未幾而宰博之
命下蒞任期年民和事簡一鶴晝閒雙鳬夜寂於以

鬯厥山靈潤色前徽正惟其時語曰五百年名山一
開必有名人爲之主盟余則豈敢然而竊有志焉爾
乃選勝尋幽而見夫福地荒涼零落之狀不勝扼腕
欲首舉冲虛而經始之又念窮簷鴻鴈杼軸其空貢
賦索於前饑寒逼於後莫不疾首蹙額爲賣絲羅穀
之計安能強之生歡喜心以種此未來之因果乎哉
用是布告于當事大人薦紳先生共宏願力同結清
緣或捐俸以資或解犀而贈庶幾前邪後許衆志成
城况名山有赫焉知不鞭石畫水以效靈乎幸毋謂

山水閒情無補經綸事業母謂工程浩莽非片瓊一
木能支但得相與有成亦點綴太平之盛事爾噫羅
浮孤峙嶺表而聲聞天下海內之紳縫隱逸緇素黃
冠以及估客鮫人樵夫牧豎聞其罡風灝氣雨經煙
巖罔不心焉慕之每歎爲紺宇璇房琪林瑤室莊嚴
瑰麗甲天下而不意其荒涼零落如是推之人民事
物山川土田大抵皆可作如是觀也職斯土者可以
深長思矣

文

朱明道院上梁文

馮元颺

靈山開落亦關小劫因緣勝剎崩興合聽人天普會
故龍沙迎而聖人示化琪樹茁而佛祖演乘屬在同
人可昧因地難浮居洞天第七朱明當複嶺初層擷
秀南離福曜遠騰於十嶽鍊形地肺虛危每集乎羣
真絕粒茹芝政賴巖巒之姿匱超情釋戀蓋資雲縹
之氣鮮然而翠巘荒蕪野鳥虛傳快樂羽衣散落踏
歌徒歎冥寥使四百三十二峯夜半無人看日出將

三千大千諸界天中何路續仙遊必令棲託好佳始
得精靈肅聚所以坡仙晚出實嘉定惠同遊若士南
來遂有徐聞一賦稚川不援岫嶠便冷丹砂梅魂偶
夢師雄聿來竊窺豈伊姝勝坐阻躋攀宮闕渺羣帝
之通縱携宣遠驚人詩誰憐搔首林水缺通人之過
卽涵小有仇池穴空爾埋煙地倚鍾靈事如有待用
啓吾師若翁韓大宗伯道炳開山式闢榛塗首號如
龍之衆載挺行邊自翁袁大司馬勳高蕩海益流檀
度竝宏神鷺之音嗣是魁壘儒宗璜球宰士上逮擁

旄分鎮之老絃歌出牧之英菽弗歸義如林導慈遵
捨凋薨夕爛洮珠自捲西山紺殿朝輝雲幙長霏北
垞莊嚴布地繇來鳥自銜花表異疑神遂有猿來獻
果希深睇神清之洞豈啻人工髣髴老戲芙蓉之城似
緣天造實稱偉麗足掩前規接濟流通凡聖仍容雜
處補偏貼陷徂徠寧阻絕攀從此招洽隱淪應有道
開子野之流御風騎氣跳出塵寰以師友造化政使
教興講院適臻公甫甘泉諸老崇正闢邪紹隆聖學
而翊衛人綱恃此不日之成已濟天下之溺願諸英

髦貴俊盍歸來拈一瓣香卽復旅泊羈遊試登臨叩
三生石行見道林宗旺時響雲璈而撾法鼓輒喚起
虎跑龍吟庶幾逋客嘲銷斲披芰製而狎荷衣姑判
抹猿驚鶴怨謬緘致語遠讚拋梁猥俗懺除敢曰元
通三昧仙靈樹止將無旋下五雲日月蔽虧四序松
筠歸闕恤山川呵禁六時風雨淨妖氛斬千百國共
奠金鷗祝億萬年永綿聖歷白少傅嵩邱紀歲數名
利長能沒人韓昌黎鱣渚留聲羨江山終堪作主努
力荷擔勿負清時幸念景光專精愛日未遑均賦聊

頌四聲浮峯羅嶽氣兼秋
削巒嵯峨跨十洲日觀新
恢天不夜翠亭春洗月常
流竭來帝子飯金粟遮莫
仙人駕赤虬妙蹟只今依
玉斧勝情容易到丹邱

羅浮山志會編卷之十三

終